

古今文綜

711.112
S7527

古今文綜

古今文綜 第二部 書牘贈序之屬

第十五冊

目錄

第二編 贈序類

第三章 壽序之體製

(甲)親戚

明歸有光六母舅後江周翁壽序

明唐時升子實弟六十壽序

清汪琬族母吳夫人六十壽序

清劉大櫟謝氏妹六十壽序

清姚鼐家鐵松中丞七十壽序

清姚鼐旌表貞節大姊六十壽序

清吳定從舅氏程端立先生六十壽序

清張泰青族母羅太孺人八十壽序

清王先謙叔母毛太宜人六十壽序

(乙)仕宦

明李東陽壽太子太保吏部尙書王公九十詩序

清林明倫費廣文七十壽序

清洪亮吉朱石君先生五十壽序

清金安瀾代楊至堂河帥作傳中丞六十壽序

清劉開韋芙岡明府七十壽序

清張裕釗湘鄉相國曾公五十有八壽序

清張之洞李傅相七十壽序

(丙)武功

清梅曾亮秦樞堂五十壽序

清劉開代某君徐將軍壽序

清張裕釗代某公黃昌岐軍門六十壽序

清張裕釗王覲臣副戎五十壽序

清趙銘代李少荃作潘琴軒中丞六十壽序

(丁)布衣

明歸有光白庵程翁八十壽序

明歸有光周弦齋壽序

清汪琬劉敘寰六十壽序

戊)學人

清黃淳耀嚴永思先生七十壽序

清潘耒顧亭林先生六十壽序

清姚鼐劉海峯先生八十壽序

清梅曾亮張南山七十壽序

清彭兆蓀錢可廬徵君六十壽序

清曾國藩唐鏡海先生七十生日同人寄懷詩序

(己)女壽

明歸有光張母太安人壽序

明歸有光王母顧孺人六十壽序

清姚鼐伍母陳孺人六十壽序

清孔廣森爲王尙書撰姚母方太恭人七十壽序

清孔廣森林母廖太安人八十壽序

清張裕釗代某公譚母謝太夫人六十壽序

清李慈銘項城袁母郭太夫人百歲壽序

(庚)雙壽

清孔廣森代撰蓬萊縣知縣吳君人驥堂上雙壽序

清曾國藩黃矩卿師之父母壽序

清曾國藩陳仲鸞同年之父母七十壽序

清吳敏樹屠禹甸夫妻八十壽序

清金安瀾薛星門封翁暨淑配郭太夫人六十雙壽序

清張裕釗吳育泉先生暨馬太宜人六十壽序

清張裕釗代某公梅小巖方伯暨雷夫人五十壽序

(辛) 方外

清黃宗羲天岳禪師七十壽序

(壬) 初度序

清彭兆蓀孫古雲四十初度序

(癸) 自序

清方象瑛七十自序

清李慈銘四十自序

古今文綜

第二部

書牘贈序之屬

第十五冊

杭縣張 相譔錄

杭縣姚漢章閱訂

第二編 贈序類

第三章 壽序之體製

生日之禮起於六朝。顏之推謂江南風俗。是日供張聲樂。唐宋以還。壽詩彌夥。元明之際。乃有壽序。自宋景濂以壽序入集。斯體遂爲大宗。然大率緣壽詩爲之。自是厥後。無詩而序。遂以爲常。歸震川曾滌生頗言其非古。讀其文集。壽序特多。匪曰惡醉而強酒也。章實齋曰。文生於質。視質之如何而施吾文焉。亦於世教未爲無補。禮從宜。使從俗。苟不悖乎古人之道。君子之所不廢也。爰仍別序之例。而先述其體製云。

(甲)親戚

淳于髡謂親有嚴客。希韓鞠臆。侍酒於前。奉觴上壽。故知此事緣起。當在家人長者之間。所謂敘天倫之樂事者也。錄親戚壽序共九首。

明歸有光六母舅後江周翁壽序

有光少不能事先孺人。迨外祖之春秋高。又不能養。至今每念外家。不勝凱風寒泉之思。先孺人同祖兄弟十有二人。今皆以零謝。而唯六母舅存。隆慶二年。於是年八十矣。當六母舅之生辰。有光方會朝京師。不能從諸兄弟於其日。爲壽。其秋自吳興還。閉門不出者數月。今將有邢臺之役。而外家諸弟來告。六母舅之壽。不可無子文也。然河南兄之序美矣。有光何以復贅。昔吾外曾祖世有惇德。生丈夫子四人。外祖最少。與諸伯祖並列第千墩浦之上。屬時承平。家給人足。兄弟怡怡。然相樂也。先皇帝之初。諸祖相繼淪謝。而外祖最高年。然皆苦徭賦。蹙耗矣。而河南兄以進士起家。則周氏之隆盛。特加於前。然同祖昆季多不振。惟獨鍾於本支。中憲公以河南之貴。受誥封。而六母舅保有世業。蓋四祖之家。惟伯祖故第。歸然。

獨存。至於今。壽考者六母舅一人而已。而子子夔年亦六十有二。尤能孝養。吾外曾祖之子四人。而外祖最少。最壽。伯祖之子亦四人。而六母舅最少。亦最壽。豈亦有數然耶。夫人生百年如旦暮。此亦過者之論。先孺人長母舅一歲也。以今追先孺人之世。歲月遙遙。何其久也。短促者既如此。而長永者又如彼。百年之內。彭殤之數可同日而語哉。有光亦何能無感也。六母舅居鄉。鄉人有訟。不之官府而之其廬。其化服鄉人有陳寔王烈之風。雖河南兄之隆事諸父。而以文稱之。非諛者。顧有光何以復贅。然河南兄祝其八十。今八十有一矣。自八而一。以至於無窮。則吾文宜續河南之後者也。

明唐時升子實弟六十壽序

我唐氏自宋之季。由蜀而越。由越而吳。居嘉定者垂四百年。長材秀民。往往出焉。然多坎壈不遇。讀書談道。一畝之宮。與四方賢豪長者往來。至今傳其翰墨贈答之詞。孝友之聲。著於其邦。雖閭閻之族。累世赫奕。必推唐氏爲名家。至我先君。道

德文章爲江左諸儒之冠。我叔父博聞高行。與古爲徒。兄弟之間。肅如朝廷。叔父中歲未有子。先君以爲憂。歲時祭祀。形於嗟歎。丙辰之春。予弟實甫以生。先君需選京師。家人謂當急附信使。以聞叔父。謂曰。吾兄歸在夏秋之交。不遠矣。今且勿聞。俟其初歸之日。子弟參列時。令乳者抱兒自通。出自不意。以博一笑之歡。不亦快乎。已而中道及於大故。竟不及聞也。終身以此爲恨。予長於實甫五歲。初度之朝。予問安叔母所。婢子戒勿譁。意凜凜循床以行。欲視弟。不敢請。及長。受書。遇時節。休假。相從嬉戲。終日。以爲極歡。後予與弟同講習。臥起一閣。叔父晏坐其下。爲淨室。風雨不之學舍。輒憑几。斂膝。連數日。不聞足音。昏晨定省。出入告面。皆有常度。嘻笑之聲。睚眦之怒。不敢施於燕居。然而竟無所成名。以慰二親之意。今俱老矣。予有薄田。爲卒歲計。灌園鬻蔬。以供朝夕。而君所居五畝之宅。內列法書名畫。鼎彝罇壘之屬。焚香展卷。不知日之昃。外則巖壑環繞。花竹斐然。四時晴晦。無所不宜。然皆好任情適志。不能夙夜兢惕。爲子孫先。先世教家之法。少衰矣。傳稱公

西華之事親。若與朋友處。曾子與事親。如嚴主烈君。而仲尼之門。獨曾氏以孝稱。嘉定之富厚貴顯者多矣。我唐氏如松柏生礪石陂陀間。雖無華茂穠麗之觀。而獨能後凋。意者先世孝慈恭敬之德。有以培之也。則知父兄之教。不可以不肅。閨門之內。小慈者大慈之賊也。苟爲吾子孫者。謹身節用。如臨深。如履薄。以修其職。言念乃祖。無墜數百年之緒。則吾兩老人者。脫粟而食。淪茗而談。仰聽鳴禽。俯觀遊魚。優哉悠哉。以樂餘年。固所願哉。若夫兼味之食。重采之衣。吾非不欲也。顧有命制之。不以望兒輩矣。乙卯之春三月十九。爲君之生日。諸子諸孫。拜君於堂上。予述六十年間事。相與獻酬。且以勸吾子孫。使知所以養二父之志云。

清汪琬族母吳夫人六十壽序

族母吳夫人以今年二月某日爲六十誕辰。夫人蓋吾再從弟寶文之母。從父維億君之配。而從祖父方伯來虞先生之婦也。先期一月。寶文乞予言爲壽。予竊有感於汪氏盛衰之際。始夫人爲婦。在前明熹宗之時。先方伯以忤魏闖私人解其

粵東藩政而歸。聲望方大重。而吾先大夫又選舉於鄉。家門敦睦。諸伯仲咸恂恂。勉於文學。號爲吳中巨族之冠。可謂盛矣。是時予年雖幼。顧猶及見之。其後先方伯再起。旣暴歿於海外。從父與先大夫復相次蚤世。汪氏稍衰。數爲外侮所侵。雖以寶文之瑩瑩少孤。亦困於徭役。不免有風雨飄搖之患。而卒能堵柱門戶。得至於成立者。是孰使之然哉。於是宗黨相聚。未嘗不嘖嘖稱道夫人以爲難。而夫人尤有不可及者。蓋自明季以來。入於國朝。吾諸父之鄉舉者二人。明經高第者一人。進士甲科得爲京朝官者。暨予又二人。此亦汪氏衰久而復之漸也。然吾族日益蕃衍。薰蕕好醜。雜出於其內。雖不乏閉戶好修之士。而一二不才者。亦往往健鬪喜訟。挾機詐。恃氣力以相較。轢汪氏殆由此不振矣。予故嘗喟然太息。思復見先方伯盛時。而訖不可得。遂不能無隱憂焉。獨寶文守其家法。讀書爲文章。有先正典雅之風。出門結納。皆吳中賢士大夫。於是寶文之名甚熾。而不知夫人實有以教之也。此其尤不可及者。與予嘗論汪氏之在今日也。於易卦當爲剝。其距先

方伯之歿。逾三十年。此之謂一世矣。於剝卦當爲爻之上九。其辭曰。碩果不食。君子得輿。今以夫人之賢。艱難。黽勉。終享壽考。豈非吾汪氏之碩果哉。予雖不復見先方伯。盛時猶當見寶文。得乘君子之車輿而蔭庇其衆也。已。

清劉大槐謝氏妹六十壽序

吾父母生吾兄弟四人。又女弟三人。家以娶婦嫁女而益貧。吾伯兄鄉舉。謁選官於徐溝。時吾母尙在。乃以道遠不獲迎養。緘恨於終身。二親既沒。伯兄始起官黔之普定。伯兄歿而余始爲博士於黔。傷哉貧也。子欲養而親不待。終古有餘痛焉。女弟三人。長適同里方氏。次殷氏。次謝氏。皆吾父母所寶貴而憐惜之者。三人之壻皆早世。去年殷氏妹亦亡。其在方氏者雖未死。而敝衣糲食。幾無以爲生。惟謝氏妹衣食粗足。而遭家多難。未嘗得一日安居。其壻師其既殂。吾妹維持門戶。撫其孤纔六歲。恐懼憂傷。備嘗艱苦。今其孤已受室。生孫甥。能自立。不至蕩廢其產業。入貲將爲官。而吾妹已六十矣。回思三十年前。驚風怒濤。恍如夢寐。甲申五月。

中旬爲吾妹設悅之辰。其在子姓姻親黨友來爲頌禱者。皆得置酒高會。獨吾伯兄仲兄及殷氏妹九原。不可復作。余又羈縻數百里外。未得手舉一觴。乃書以告其甥曰。爲此春酒。以介眉壽。古之人皆然。甥能愛敬其親。則置酒以延子姓姻親黨友。亦愛敬其親之道也。愛敬其親以及人之親。而人因以愛敬吾親。則子姓姻親黨友之來相頌禱。亦愛敬其親之道也。繼自今親之年益高。則子之養益難待。子之愛敬其親。宜有加而親待其子之愛敬。乃益迫矣。予所拮据。予所捋荼。予所蓄租。予口卒瘁。謝氏甥其能一日忘哉。

清姚鼐家鐵松中丞七十壽序

維歲乙卯春二月。吾兄鐵松先生由廣西巡撫移臨雲南。於故事當覲於朝。會黔中有疆場事。吾兄當助籌糧運以應軍興。將待胥靖而後請覲焉。是夏六月。先生七十初度。以國事方殷。幕府之前。命無得以祝壽言。而吾嫂方夫人及其子伍祺。方留任家事於里。方夫人慈和惠愛。幼先生一歲。來年五月亦七十矣。伍祺將進。

觴於室。且以寄祝於先生。而俾鼐爲之辭。鼐聞之詩曰。汎汎楊舟。紉纒維之。此言諸侯佐天子任民事。如將舟者。必有維繫之勞也。旣而曰優哉游哉。亦是戾矣。言旣勤勞之後。則道洽治成。優游無事。以造於天子之朝也。吾兄早居繁劇。屢任封疆。宣力奏績。感激知遇。今以七十之年。精力方剛。許國之情彌厲。忘家之節愈堅。非所謂紉纒維之者乎。所治事寧。將趨闕下。優游是戾。旋當其會矣。而吾兄不敢亟言優游。唯盡力於勤勞。則誠忠孝之至也。仰維聖人臨馭重熙。而久治海內。鼓舞於萬壽無疆之樂。而大臣蒙錫福而佐嘉謨者。又皆耆造之人。雍容化日。盛世之福也。吾家積德累數世二三十年矣。而舉族壽登耄耋者極少。吾兄少居貧。以孝名天下。備經勤苦矣。乃老而康艾登焉。且其始仕河隴之間。分符江漢之域。觀察閩海。提刑南越。所處每在邊徼。遭值時勢盤錯。或爲常情所難居。而肩任不疑。屢禽大憝。惠布遠黎。今又居昆明。西南數千里。建旄秉鉞。爲國家安奠中外。愈任其勞。福祿愈遠。此殆天所篤祐。以助承景運之隆者。夫豈偶然哉。然則上引天下。